

ano nga rarangi whakamarama i te taha o ia wharangi, o ia wharangi.

Whakaaetia ana.

Ka nukuhia i konei te Hui ki te 9 o nga ra o Tihema.

I panuitia, i whakapumautia,
9 Tihema, 1890.

W. L. WILLIAMS,
Upoko.

TUREI, 9 TIHEMA, 1890.

No te 9h. 30m. i huihui ai ano ki roto ki te whare; ka timataia hoki te mahi ki te Inoi.

Katahi ka panuitia, ka whakapumautia nga tuhituhinga o te mahinga onanahi.

I whakaaria e Mohi Turei, minita, i tautokona e Hone Waitoa, minita :—

Ko te Hui o te Hahi Maori o te Takiwa o Turanga, kia tu ki te Pariha o Rangitukia a Tihema o te tau 1892; kia whakatepe hoki te haere ki era pariha.

Whakaaetia ana.

I whakaaria e Rutene Te Arahi, i tautokona e Hone Waitoa, minita :—

He kupu tenei ki nga kainga nunui, kahore nei kia whai whare-karakia, kia whai whare-minita, kia puta te whakaaro ki te hanga whare-karakia, whare-minita mo ratou.

Whakaaetia ana.

I whakaaria e Te Manihera, minita, i tautokona e Te Waaka Tuteranginoti :—

He kupu maioha tenei na tenei Hui ki nga mahita kura, me nga kai-whakaako Maori, e ako nei i nga tamariki i nga Ratapu. Me perehi tenei motini ki te reo Ingarihi, me tuhatuha ki nga mahita o nga kura, kia mohio ai ratou ki te mihi a te Hui o te Hahi ki ta ratou mahi pai.

Whakaaetia ana.

I whakaaria e Hone Waitoa, minita, i tautokona e Rutene Te Arahi :—

Kia whai whakaaro nga tangata o ia pariha, o ia pariha, ki te kohikohi i tetahi moni, hei whakakaha i te mahi kawae i te Rongopai ki nga wahi pouri o tenei motu, ki nga wahi pouri katoa hoki o te ao.

Whakaaetia ana.

I whakaaria e Ratima Te Awekotuku, i tautokona e Te Wiremu Hapata, minita :—

He whakawhetai tenei ki te tangata whenua, ki te Pakeha,